



Broj: 02-03-533/26

Sarajevo, 15. 05. 2026. godine

Na osnovu člana 17. Uredbe o postupku prijema u radni odnos u javnom sektoru na teritoriji Kantona Sarajevo („Službene novine Kantona Sarajevo“, br: 19/21, 10/22, 28/23 i 32,24), člana 17. Pravilnika o radu Kantonalnog stambenog fonda Sarajevo broj: 02-03-101/25 od 27.01. 2025. godine, ovlaštenja iz člana 14. u vezi sa članom 16. Statuta Kantonalnog stambenog fonda Sarajevo, broj: 02-169-2/2006 od 16.02.2006. godine i broj: 01- 1344 - 5/2012 od 27.07.2012. godine, te u cilju osiguranja zakonitosti, nepristrasnosti i transparentnosti postupka izbora kandidata po javnom konkursu, direktor Kantonalnog stambenog fonda Sarajevo (u daljem tekstu direktor Fonda) **donosi:**

ODLUKU

o poništenju javnog oglasa za prijem u radni odnos

Član 1.

Poništava se Javni oglas za prijem u radni odnos na radno mjesto Stručni saradnik za ekonomske poslove u Odjelu za pravne i ekonomske poslove Kantonalnog stambenog fonda Sarajevo, objavljen dana 27. 04. 2026. godine.

Član 2.

Javni oglas iz člana 1. ove Odluke poništava se zbog utvrđenih nepravilnosti u radu Komisije za izbor kandidata.

Utvrđeno je da je jedan član Komisije, nakon što je saznao za postojanje razloga za svoje izuzeće zbog srodstva sa jednim od prijavljenih kandidata, nastavio učestvovati u radu Komisije i preduzimati daljnje radnje u postupku izbora kandidata, uključujući otvaranje prijave, pregled formalne ispravnosti prijave, sačinjavanje i dostavljanje obavijesti kandidatima, kao i druge radnje od značaja za provođenje konkursne procedure.

Navedene okolnosti dovode u pitanje nepristrasnost Komisije i zakonitost provedenog postupka, te predstavljaju osnov za poništenje javnog oglasa u cilju zaštite jednakog tretmana svih kandidata i očuvanja integriteta konkursne procedure.

Član 3.

Nakon stupanja na snagu ove Odluke, pokrenut će se nova procedura raspisivanja i provođenja javnog oglasa u skladu sa važećim propisima.

Član 4.

Ova Odluka stupa na snagu danom donošenja i objavit će se na službenoj web stranici Fonda i na web stranici Službe za zapošljavanje Kantona Sarajevo i ista ostaje objavljena namanje 15 dana.

Obrazloženje

Rješenjem direktora broj: 02-03-386/26 od 15. 04. 2026. godine formirana je Komisija za provođenje postupka Javnog oglasa za prijem u radni odnos na neodređeno vrijeme za radno mjesto Stručni saradnik za ekonomske poslove u Odjelu za pravne i ekonomske poslove u Kantonalnom stambenom fondu Sarajevo,



Putem protokola Fonda dana 13. 05. 2026. godine, zaprimljen je zahtjev za izuzeće člana Komisije, iz razloga postojanja srodstva koji može dovesti do nepristrasnosti u provođenju postupka javnog oglasa.

Po prijemu zahtjeva za izuzeće iz Komisije, direktor Fonda je aktom broj:02-03-525/26 od 14. 05. 2026. godine tražio izjašnjenje svih članova Komisije o postupanju od otvaranja prijave do podnošenja zahteva za izuzeće člana Komisije, odnosno da li je član Komisije koji traži izuzeće, prilikom otvaranja prijave upoznala članove Komisije sa okolnosti srodstva.

Članovi Komisije su dana 15. 05. 2026. godine dostavili direktoru pisano izjašnjenje – zapisnik broj:02-03-386-12/26 od 15. 05. 2026. godine.

U postupku provođenja javnog oglasa utvrđeno je postojanje okolnosti koje mogu uticati na zakonitost i objektivnost postupka izbora kandidata. Član Komisije za izbor kandidata podnio je zahtjev za izuzeće zbog srodstva sa jednim od kandidata, ali je prije podnošenja zahtjeva, odnosno i nakon saznanja za postojanje razloga za izuzeće, učestvovao u radu Komisije i preduzimao radnje u okviru konkursne procedure.

Kako nepristrasnost članova Komisije predstavlja osnovni uslov za zakonito provođenje postupka, ocijenjeno je da navedeni propust predstavlja bitnu povredu postupka, zbog čega je odlučeno kao u dispozitivu ove Odluke.

Pouka o pravnom lijeku

Protiv ove Odluke može se pokrenuti postupak pred nadležnim sudom u skladu sa važećim propisima.

Dostaviti:

- Komisiji- x4,
- Sekretaru Komisije
- Odjel za pravne i ekonomske poslove,
- Svim kandidatima x3
- U evidenciju
- a/a

